

# JOSANKINARI PABLO JOTYAANTZINIRI FILEMÓN

---

## Withataantsi

<sup>1</sup>Naaka Pablo osankinat zimirori jiroka. Tima jomontyaawintaitakinari naaka Jesucristo jaka. Iri notsipataka iyiki Timoteo nosankinat zimiro jiroka. Irokataki notyaantzini, Filemón, nitakotani nowimi, iiroka imitakotapiintakinari. <sup>2</sup>Iro nosankinat zini Apia nokimitakaantaawo “tyootyo”, ipoña nosankinat ziniri iijatzi Arquivo tsipayitakairi añaashintsiyita. Irijatzi nosankinat zini kimisantzinkariiti ikaatzii apatotapiintachari pipankoki. <sup>3</sup>Onkamintha inishironkayitaimi Ashitairi Pawa, iijatzi Awinkathariti Jesucristo, kamiitha isaikakaayitaimi.

## Jitakonka ipoña joshirinka Filemón

<sup>4</sup>Aririka namanamanaatakoyitimi, antawoiti nopaasoonkitziri Pawa. <sup>5</sup>Tima nokimakotakimi itakotani powantzi, kinatani powiri Awinkathariti Jesús, ari pikimitairi iijatzi ikaatzii jashiyitaari irirori. <sup>6</sup>Iro namanakotant zimiri inkini paapatziyawakaayitaiya iirokaiiti poshiriyitaa, pinkimathapirotanairo kamiitha okaatzii jantakaashiritaimiri Cristo Jesús pikimisantairi. <sup>7</sup>Iyiki, itako powapiintanairi iiroka oshiriyitanaachari, irootaki jiñaantakawori iriroriiti ithaamintashiriproyita. Irojatzi oimoshirinkakinari iijatzi naaka, thaaminta nokanta.

## Pablo ikantakowintziri Onésimo

<sup>8</sup>Niyotzi iroñaaka, naaka jowawitaka Cristo nimonkaatakaimiromi onkaati pantairi. <sup>9</sup>Iro kantacha, apa nonkowakotashitimi kapichiini, tima niyotaki tsika pikanta pitakotanta. Pablo ninatzi naaka, antaripirotaakina, jomontyaawintaitakinari Jesucristo. <sup>10</sup>Jirika Onésimo nokowaki paawakiri kamiitha. Iriitaki nokimitakaantakiri iriimi

notomi, tima naakataki oshiritakaakari Cristo jomontyaitakina.<sup>a</sup> <sup>11</sup>Tima ti opantawitari jirika, irooma iroñaaka iri opantzimotaimiri iiroka, ari inkimitzimotinari naaka ijatzi. <sup>12</sup>Tima ijatzi notyaantaimiri Onésimo, itzimi nitakoniintari. <sup>13</sup>Ojyiki nokowawitaka intsipatinami naaka. Ari onkantakimi impoyaatimi iiroka jimitakoyitina jaka jomontyaitakina okantakaantziro nokinkithatakotziro Kamiithari Ñaantsi. <sup>14</sup>Aña iro kamiithatatsi, tikiraata nokimi pinkantina iiroka oita pikowiri, ti nokowi naaka noshintsiwintimi pantiro jiroka, iro nokowaki iirokatajaantaki kantatsini oita pikowiri pantiri.

<sup>15</sup>Aamashitya irootajaantaki imatantakari ishinitaitziri jirika Onésimo ishiyapithatantakimiri pairani, ari okanta ikimisantantaariri Cristo irojatzi impiyantaiyaari intsipatapiintapaimiri iiroka. <sup>16</sup>Iro kantacha, ti apa pinkimitakaantairi pompiratani pikimiwitari pairani, aña pinkimitakaantairi iriimi pirintzi pitakopirotoni. Ari nokimitakaantakiri ijatzi naaka. Aña iiroka mapirotataitironi pitakopirotoiyaari pompiratari koñaawoini, irijatzi jompirataari ijatzi Awinkathariti. <sup>17</sup>Tima pikimitakaantakina iiroka, naaka pitsipatani, ari pinkimitairi ijatzi irirori paawakiri kamiitha, pinkimitakaantiri naakami paawakimi. <sup>18</sup>Tzimatsirika oita kaari jinimotakaimi, tzimatsirika oitya jiriiwitzimiri, pinkimitakaantiro naakami iriwiwimini. <sup>19</sup>Naakataki, Pablo osankinatajaantzimirori jiroka. Imapirotatya, aritaki nompinataimiro jiriiwitzimiri. Añaajaantaki iirokataki iriwiwipirotonari naaka nowawijaakoshiritakaantaimi <sup>20</sup>Ari okanta iyikí. Nokowataiki inkantakaiyaami Awinkathariti paawakiri kamiitha Onésimo, tima irootaki inimoshiritinari.<sup>b</sup> <sup>21</sup>Iro nosankinatantzimirori jiroka niyotzi aritaki pimatakinawo, tima aritaki pimatakiro ari panaakaanakiro okaatzi nokowakotakimiri. <sup>22</sup>Nokowataiki ijatzi, paamaakowintina niyaatashitimi pisaiki iiroka, ari nomayimotapaakimiri. Iroorika pinkamitantakiri pamanakotina, ari ishinitakiro Pawa imatya.

### Iwiyaantakawori jiwithatantaitzi ipoña itasonkawintantaitzi

<sup>23</sup>Ari jiwithatzimi Epafras, notsipatakari jaka jomontyaawintaitanari Cristo Jesús. <sup>24</sup>Ari jiwithatzimiri ijatzi Marcos, Aristarco, Demas ipoña Lucas, iriitaki notsipatapiintakari jaka. <sup>25</sup>¡Onkamintha inishironkataimi Awinkathariti Jesucristo! Ari onkantyaari.

---

<sup>a</sup> **10** Jiroka wairontsi Onésimo iñaaniki iriroriiti okimiwaitawo akantziri aaka: “Opantaari”. <sup>b</sup> **20** Kantakotachari jaka “paawakiri kamiitha Onésimo”, irojatzi ikantsitari: “Nokowataiki pimpantzimotaina iiroka”. Tima iñaaniki iriroriiti iwairo inatzi Onésimo jiroka: “Opantaari”.